

ՎԻՄԱԳՐԱԿԱՆ

ԽՆԱԾԱԽԻ ՊԱՏՄԱՄՇԱԿՈՒԹԱՅԻՆ ԺԱՌԱՆԳՈՒԹԻՒՆԸ

Պատմահնագիտական յուշարձաններով հարուստ Սիւնեաց աշխարհի հին ու լրքւած գիւղատեղիներում մինչ օրս պահպանուել են քարայր-մատուռներ, աղբիւրներ, կամուրջներ, գերեզմանատներ, որոնց տարբեր առիթներով անդրադարձել են նախորդ հետազոտողները: Մեր խնդիրն է ուսումնասիրել այդ յուշարձանները վիմագրագիտական տեսանկիւնից: Սիւնեաց վիմագրական հարուստ ժառանգութիւնը հիմնականում իր ամփոփ տեղն է գտել «Դիւան հայ վիմագրութեան» մատենաշարի երկրորդ պրակում: Ցաւով պէտք է նշել, որ ինչ-ինչ պատճառներով դրանց մի մասը դուրս է մնացել ուսումնասիրողների տեսադաշտից: Սոյն յօդուածով փորձ է արւում լուսաբանել Սիւնեաց աշխարհի մեծաքանակ գիւղերից մէկի՝ Խնածախի անտիպ վիմագրերը:

Խնածախը (յայտնի նաեւ՝ Խանազակ, Խոնածախ, Խանածախ անուններով): Գրտնւում է ՀՀ Սիւնիքի մարզում, Գորիս քաղաքից 10 կմ հիւսիս-արեւելք: Ըստ պատմագիր Ստեփանոս Օրբէլեանի հարկացուցակի՝ գիւղը պատմական Հաբանդ գաւառի կազմում է՝ 20 միաւոր հարկով¹: Հնագիտական պեղումների արդիւնքները վկայում են, որ գիւղը բնակեցուած է եղել վաղնջական ժամանակներից: 1980-1981 թթ. հնագէտ Օնիկ Խնկիկեանի կողմից դամբարաններ եւ կացարաններ են պեղուել Խնածախում: Չորս դամբարաններից պեղուած նիւթերը, բրոնզէ թիթեղից ձեռնափի տեսքով պատրաստուած կախիկը, որը Հայաստանում գտնուել է առաջին անգամ, պահպանւում են Երեւանում²:

Ինչպէս նշում է Մորուս Հասրաթեանը, 13-րդ դարից սկսած Խնածախը դառնում է Սիւնիքի առաջնակարգ կենտրոնը (վարչական առումով)՝ գերազանցելով Տաթևին, Տեղին, Գորիս-Վերին շէնին եւ Անգեղակոթին³: Հեղինակը մի ծաւալուն ուսումնասիրութիւն ունի նուիրուած Քաշաթաղ-Խնածախ բնակավայրերին⁴, այնտեղ ապրած ու մեծ պատմութիւն կերտած մեծաքանակ տանը, որտեղ հանգամանօրէն քննւում է մեծաքանակի, նրանց ժառանգների, պատմական այդ ժամանակահատուածում նրանց թողած դերի ու նշանակութեան մասին: Ըստ փաստերի՝ Քաշաթաղի մեծաքանակ տունը սերւում է Վայոց ձորի Պոռշեան իշխանական տոհմից⁵:

Հաբանդ գաւառում ձեւաւորուած մեծաքանակներից ամենագորեղը մեծաքանակ-կազեան տունն է: Այն յիշատակւում է որպէս Քաշաթաղի, իսկ աւելի ուշ՝ Խնածախի մեծաքանակներ: 16-րդ դարի առաջին կէսին մեծաքանակ Հայկազ Ա-ի որդին՝ Հախնազարն իրենց նստավայրը Քաշաթաղից տեղափոխում է Խնածախ գիւղ, որտեղ եւ ծաւալում է իր յետագայ գործունէութիւնը: Տեղափոխման հիմնական պատճառն այն էր, որ մահմետական իշխանութիւնները Քաշաթաղում սկսել էին բնակեցնել քրդական քոչուոր ցե-

¹ Ստ. Օրբէլեան, Պատմութիւն նահանգին Սն, Թիֆլիս, 1910, էջ 399:

² Օ. Խնկիկեան, ՊԲՀ, 1988, №1, էջ 235: Ս. Հախնաթեան, Գորիսի ամփոփ պատմութիւն, Երեւան, 2005, էջ 52:

³ Մ. Հասրաթեան, Պատմա-հնագիտական ուսումնասիրութիւններ, Երեւան, 1985, էջ 156:

⁴ Նոյն տեղում, էջ 155:

⁵ Նոյն տեղում, էջ 162:

ղերի, որի համար էլ հայ մելիքները նման որոշում կայացրին⁶։ Գիւղի ձորամիջեան ճանապարհի եզրին⁷ պահպանուել է մելիքական ապարանքը, որը 16-րդ դարից մեզ հասած պալատական հագուստի տառապանքն է՝ դարաշրջանին յատուկ յօրինուածքով⁸։ Ապարանքը յետագայում ժառանգել է մելիք Հախնազարի որդին՝ մելիք Հայկազը (1551-1623 թթ.)։ Նա վայելում էր շահ Աբաս Ա-ի համակրանքը եւ ըստ աւանդութեան շահի կողմից ստացել էր «Ծեր առիւծ» մականունը⁹։ Այդ փաստն արձանագրուած է նաեւ այլ աղբիւրներում. «Անապատին հիմնարկողներուն կարգին պիտի յիշենք նաեւ ոչ կրօնաւոր մէկ մը, Զուղայեցի Հախնազարի որդի Հայկազն իշխանը, որուն անունը անգամ մը տուինք եւ զոր զինուորական քաջութեան համար Շահաբաս շատ սիրեց, և կացոյց զնա իշխան երկրի, հանեալ ի պատիւ մեծութեան»¹⁰։

Մելիք Հայկազեանների շառաւիղների հետքերը 19-րդ դարի առաջին կէսին գըտնում ենք մե՛րթ Քութայիսում, մե՛րթ Շաքի քաղաքում¹¹։ 1899 թուականին տպագրուած «Մուրճ» ամսագրում յիշատակութիւն կայ մելիքական այս տոհմի ներկայացուցիչներից մէկի մասին։ Այսպէս. «Մելիք-Հայկազեան Իսահակ, գնդապետ, վախճանուեց Թիֆլիսում, Փետր. սկզբներին։ Հանգուցեալը, որը վերջին տարիներս ծառայութեամբ իբրիտալումն էր, աւելի առաջ, Ախալցխա եղած միջոցին 10 տարի եղաւ նախագահ Կովկասի Հայոց բարեգ. ընկերութեան Ախալցխայի ճիւղի, ուր նա գործեց այնքան եռանդով, որ ճիւղի առաջարկով՝ ընկերութեան կենտրոնի ընդհանուր ժողովը նորան ընկերութեան պատուաւոր անդամ նշանակեց»¹²։

Գնդապետ Իսահակ Մելիք Հայկազեանցը ստանձնել էր նաեւ 1890 թուականին Անիում Կաթողիկէ եկեղեցու խաչկալը կառուցելու ծախսը¹³։

Յուշարձանագէտ-պատմաբան Ս. Կարապետեանը մի առիթով անդրադարձել է Քաշաթաղի մելիքական տոհմից սերող Դաւիթ Լազարեւի տապանաքարի վերձանութեանը¹⁴ (նկ. 1)։ Տապանաքարը գտնուում է Շաքիի «ղարիպականաց» գերեզմանատանը։ Հանգուցեալի որդին՝ Իվան Դաւիթ Լազարեւը, ռուսական բանակի զինուորական գործիչ էր¹⁵։ 1867 թ. նրան շնորհուել է գեներալ-լէյտենանտի կոչում¹⁶։ Նշանաւոր գեներալի կրտսեր եղբայրը՝ Յակոբ Դաւիթ Լազարեանը (ռուսական բանակի գնդապետ, 1824-1903), ծնուել եւ մեծացել է Շուշիում։ Նրա մասին ասում է. «Թողնելով զինուորական ծառայութիւնը, զբաղուել է պատմութեամբ։ Իր ձեռքի տակ եղած պատմական կարեւոր արժէք ունեցող փաստաթղթերը եւ տեղեկութիւնները նա տրամադրել է Րաֆֆուն՝ «Խամսայի մելիքութիւնները» եւ ռուս զինուորական պատմաբան Վ. Պոտտոյին՝ «Գեներալ ադիւտանտ Յ. Դ. Լազարեւ», «Ղարաթաղի առաջին կամաւորները»

⁶ Ս. Հախնազարեան, նշ. աշխ., էջ 5։

⁷ Ա. Ղուկեան, Արցախի եւ Սիւնիքի մելիքական ապարանքներ, Երեւան, 2001, էջ 23։

⁸ Նոյն տեղում, էջ 25։

⁹ Մ. Հասարթեան, նշ. աշխ., էջ 156։

¹⁰ Մաղաքիա Արք. Օրմանեան, Ազգապատում, հ. Բ., Ս. Էջմիածին, 2001, սիւն 2731։

¹¹ Ս. Կարապետեան, Հայ մշակոյթի յուշարձանները Խորհրդային Ադրբեջանին բռնակցուած շրջաններում, հ. 3, Երեւան, 1999, էջ 126։

¹² «Մուրճ», Թիֆլիս, 1899, № 1, էջ 144-145։

¹³ «Մշակ», Թիֆլիս, 1890, № 1, էջ 3։

¹⁴ Ս. Կարապետեան, նշ. աշխ., էջ 126։

¹⁵ Генераль-Адъютантъ Иван Давыдович Лазаревъ. Составиль В. Потто, Тифлисъ, 1900.


¹⁶ Ա. Ս. Ղազիեան, ԲՀԱ, Հ. Դ. Լազարեանի նամակները Առաքել Կոստանեանցին, 1988թ., հ. 2, էջ 220։

աշխատութիւններում օգտագործելու համար¹⁷։

Խնածախի տարածքում պահպանուած հնագիտական յուշարձաններն են. գիւղից 1 կմ հարաւ «Խաչին խուլթ» կոչուող բլրի հարաւային լանջին գտնուող դամբարանադաշտ (մ. թ. ա. 1 հազ.), գիւղի շուրս կողմերի բարձունքներին կանգնեցուած 1301, 1581, 1601, 1620 թուակիր խաչքարեր¹⁸, Սբ. Հռիփսիմէ եկեղեցի (1610 թ.), քարայր-եկեղեցի, որը գտնուում է Անապատի ձոր կոչուող վայրում, երկու մատուռ, մզկիթ, աղբիւր, նշանաւոր մելիքական ապարանք։

Սուրբ Հռիփսիմէ եկեղեցի. Գտնուում է գիւղի արեւմտեան կողմում՝ Գիւնի կոչուող թաղամասում, կառուցել է մելիք Հայկազ Բ-ն։ Եռանաւ, թաղածածկ եկեղեցի է՝ զոյգ աւանդատներով, կառուցուած մանր քարերով, ունեցել է երկու մուտք՝ հարաւից եւ արեւմուտքից, հարաւային մուտքը ներկայումս չի գործում։ Հստ եկեղեցու ճակատակալ քարի արձանագրութեան՝ կառուցուել է 1610-1615 թթ.։


1. Եկեղեցու բարաւորին, 2 տող.



1610 /ԹՎԻՆ/ ՌԿԳ (1615)։ Նկ. 2

1701 թուականին, եկեղեցուն արեւմտեան կողմից կից կառուցուել է սրբատաշ գաւիթ, իսկ 1905 թուականին՝ զանգակատուն։

2. Գաւթի արեւմտեան պատին՝ արտաքուստ, 5 տող.



ԹՎԻՆ / ՌՃԾ (1701)

ԿԱՄԱԽՆ ԱՅ ԵՄ ՊՐԻՆ ԱՂԱՃԱՆ ԲԷԿՍ,
ՇԻՆԵՅԻ ԶԳԱԽԻԹՍ Ի ՎԵՐԻԱՅ ԳԵՐԵԶՄԱՆԻ
ԵՂԲՕՐՆ ԻՄՈՅ ՊՐԻՆ ՊԷԱԹՈՐ ԲԷԿԻՆ¹⁹։ Նկ. 3

¹⁷ Ա. Ս. Ղազիեան, ԲՀԱ, նշ. աշխ., էջ 38։


¹⁸ Թ. Խ. Յակոբեան, Ստ. Տ. Մելիք-Քալաշեան, Հ. Խ. Բարսեղեան, Հայաստանի եւ յարակից շրջանների տեղանունների բառարան, հ. 2 (դ-կ), Երեւան, 1988, էջ 743։

¹⁹ Այս արձանագրութեանն անդրադարձել են Գորիսի պետական համալսարանի դասախօսներ Ս. Հախուն-

Խոտ գիւղի վարչական տարածքում գտնուող Մրգաձորի Ս. Աստուածածին եկեղեցու բարաւորի արձանագրութիւնը բովանդակային առումով հետաքրքիր տեղեկութիւն է հաղորդում վերոյիշեալ Պահօր բեկի գործունէութեան մասին: Ստորեւ Մրգաձորի եկեղեցու բարաւորի շինարարական արձանագրութիւնը. «Ես՝ պարոն Պահօր պակս, որդի/ պարոն մէլիք Հախնազարին, որ եմք յերկրէն Քաշ[ա]թաղուց, ի գեղջէն Խանածա/խա, ես և մայր իմ Մահփարին, շինել տվինք/ սբ եկեղեցիս փրկութի[ին] հոգոյն թվ[ին] ՌՃԽԹ (1700)²⁰»:

Արձանագրութիւններից պարզ են դառնում, որ եկեղեցին կառուցել են Խնածախ գիւղում ապրող Քաշաթաղի Մելիք Հախնազարի կինը՝ Մահփարին եւ նրանց որդին՝ Պահօր բեկը: Երկու արձանագրութիւններում էլ յիշատակուած է միեւնոյն Պահօր բեկը, որը որդին էր մելիք Հախնազարի եւ եղբայրը Աղաճան բեկի: Մրգաձորի եկեղեցու արձանագրութիւնը եւս մէկ դրուագ է ապացուցելու Սիւնեաց ազնուազարմ տիկնանց ծաւալած շինարարական գործունէութիւնը:

3. Շինարարական արձանագրութիւն նախորդին կից, արտաքուստ՝ 4 տող.



ԱՅՍ ԳԱԽԻԹՍ ՆՈՐՈ

ԳԵՅ ՂԱՀՐԱՄԱՆՅԱ

ԲՈՒԹԻԻՆԻԱՆ

1897: ՆԿ. 4

1894


Ըստ վիմագրի՝ գաւիթը վերանորոգուել է 1897 թ. Ղահրաման Յարութիւնեանի մեկենասութեամբ:

Եկեղեցու ներսում կան սալատապաններ՝ «այս է տապան», «լուսայհոգի» արձանագրութիւններով: Առաջին հայեացքից թւում է, թէ եկեղեցու ներսում թաղումներ են արուել, մինչդեռ դրանք եկեղեցուն կից գերեզմանատան տապանաքարերն են, որոնք 1937 թ. կողեկտիւացման տարիներին քանդուել են կոմունիստների կողմից եւ որպէս շինաքար օգտագործուել եկեղեցին վերանորոգելու ժամանակ, որը յետագայում պիտի ծառայեր որպէս պահեստ²¹:

4. Տապանաքարի բեկորներ.



ԱՅՍ Է ՏԱՊԱՆ:



ԼՈՍԱՅՀՈԳԻ:

դեանը եւ Գ. Շաբունցը՝ վերլուծելով այն այլ տեսանկիւնից: Մենք վերծանութեանը կից տալիս ենք համապատասխան գրչագիրը եւ լուսանկարը:

²⁰ Ս. Հախունդեան, Գ. Շաբունց, Մրգաձոր գիւղի տեղադրութեան եւ այդ գիւղում եկեղեցի կառուցած սիւնեցի տիկնոջ ինքնութեան հարցի շուրջ, Հայագիտական ուսումնասիրութիւն (գիտական յօդուածների պարբերական ժողովածոյ), Ստեփանակերտ, 2017, էջ 14-18:

²¹ Այս տեղեկութիւնը մեզ հաղորդեց խնածախցի Արզամ Լալայեանը:

Հարկ ենք համարում նշել, որ եկեղեցում ժամանակին ծառայել են Տ. Արսէն եւ Տ. Ալեքսանդր քահանաները, որոնց անունները վկայուած են Հայաստանի ազգային արխիւի ծխական մատեաններից մէկում:


1. Արսէն քահանայ – 1881 թ.

2. Ալեքսանդր քահանայ Տէր-Աստուածատրեանց – 1896 թ.²²:

Գիւղի նախկին մանկավարժ Ալեքսանդր Մուսաէլեանի անձնական արխիւում գրառումներ եւ տեղեկութիւններ կան գիւղի պատմութեան մասին: Մանկավարժն այդ նիւթերը հաւաքել է, հաւանաբար, յետագայում գիւղի պատմութիւնը լուսաբանելու եւ տպագրելու համար: Խնածախի դպրոցի տնօրէն Արտաւազդ Աբրահամեանի աջակցութեամբ ձեռք բերեցինք Մուսաէլեանի արխիւում գտնուող նիւթերը, որոնք որոշ առումներով ուղեցոյց դարձան մեզ համար: Այնտեղ եւս յիշատակում են վերը նշուած քահանաները. «Եկեղեցում աշխատել են երկու քահանայ (տէրտէր), մեծ եւ փոքր: Մեծ քահանան եղել է Արսէն Ասատրեանը, թաղուած է եղել եկեղեցու բակում: Նրա որդին՝ Վասիլ Ասատրեանը, յետագայում հօր դիակը հանել է եկեղեցու բակից եւ տեղափոխել ընդհանուր գերեզմանատուն, իսկ փոքր քահանան՝ Ալեքսան Ասատրեանը, թաղուած է եկեղեցու հիւսիս-արեւելեան կողմում»²³:

Եկեղեցու հիւսիսարեւելեան կողմում երկու տապանաքար կայ՝ գծապատկերներով, անգիր, ուստի դժուարանում ենք ասել, թէ դրանցից որն է Տէր Ալեքսանի տապանաքարը: Մեզ յաջողուեց եկեղեցու բակում՝ պատի տակ գտնել տեղահանուած, ջարդուած եւ փոքր-ինչ եղծուած գրով մի տապանաքար, որն ըստ ամենայնի Արսէն քահանայինն է:

5. **Տապանաքարի բեկոր, 4 տող.**



[ՏԱ] ՊԱՆ Ի ԳԻ[ՐԵԶՄԱՆ]

ԵԻ ՄԵՐ

Ք ԶԱՐՍԵ[Ն]

... Ի: Նկ. 5

Յաջողուեց գտնել նաեւ Արսէն քահանայի եւ կողակցի միասնական տապանաքարը: Ինչպէս վերը նշեցինք, Արսէն քահանայի աճիւնը տեղափոխուել էր գիւղի ընդհանուր գերեզմանատուն:

6. **Քառակողմ յուշակոթող, չորս կողմերում արձանագրութիւններ.**

1. ԱՐԴ ՀԱՆԳԶՈՒՄ / Է ԱՅՍԵՂ ԱՆ/ՓՕՓԵԱԼ ՄԱՐ/ՄԻՆԸ ԼՈՒՍԱ/ՀՕԳԻ ԵՒ ՀՈՒՐԱ/ՄԷՐ ՄԱՐՔԱՐ/ԻՏ ՏԷՐ-ԱՍՏ/ՈՒԱԾԱՏՈՒՐ/ԵԱՆՅՆ՝ ԿՕՂԱԿԻՑ /ԱՐՄԷՆ ՔԱՀԱՆԱՅԻ, / ԾՆՎ[ԱԾ] 1865 Թ. / ՎԱԽՃ[ԱՆՈՒԱԾ] 19...:

²² ՀԱԱ, ֆոնդ 47, ցուցակ 5, գործ 562:

²³ Այլ. Մուսաէլեանի անձնական արխիւ (պահուում է գիւղում՝ իր հայրական տանը):

2. ԲԱՐԻ ՅԻՇԱ/ՏԱԿՍ ՊԱՐ/ՏԱՌՐՎԱԾ / ԱՐԺԱՆԱ/ՈՐ ԵՆՔ ՀԱ/ՄԱՐՈՒՄ ՄԷՐ / ԾՆՕՂՆԵՐԻՆ / ՄԵՆՔ ԵՂԲԱ/ՅՐՔՍ:

3.ԱՐԴ ՀԱՆԳՉՈՒՄ /Է ԱՅՍՏԷՂ ԱՆ/ՓՕՓԵԱԼ ՄԱՐ/ՄԻՆԸ ԼՈՒՍԱ/ՀՕԳԻ ՀԱՅՐ ԺՕՂՕ/ՎՈՒՐԴԻ ԱՐՍԷՆ/ ՔԱՀԱՆԱՅ ՏԷՐ-/ՊՕՂՕՍԵԱՆ ՏԷՐ-/ԱՍՏՈՒԱԾԱ/ՏՈՒՐԵԱՆՅԻ/ 1881 թ. ՕԳ 11 ԻՆ ԾՆՎ[ԱԾ] Է 1958թ ՎԱԽՃ[ԱՆՈՒԱԾ]:

4. ԲԱՐԻ ԺՕՂՕ/ՎՈՒՐԴԻ ՅԻՇԷ/ՅԷՔ ԴՈՒՔ ԱՅՆ ՕՐԸ, ՈՐ/ԾԵՉ ՀԵՏ ԷԻ ԱՇԽԱՐՀՈՒՄ ..1 ՏԱՐԻ/ԲԱ/ ՅՅ ԱՆԳՈՒԹ ՄԱՀԸ ՇՈՒՏ/ԲԱԺԱՆԵՅ ԻՆՉ ԾԵՉԱՆԻՅ... Նկ. 6, 7, 8, 9:

Հստ գիւղի տարեցներից Սվետլաննա Աբրահամեանի պատմածի՝ «Ըդերանց Արսենը եւ ըդերանց»²⁴ Ալեքսանը հորեղբոր տղաներ են եղել: Ասում են գիւղացիների կողմից սիրուած քահանաներ են եղել ըդերանց տղերքը: Մինչեւ հիմա էլ նրանց տոհմը կայ, ապրում են գիւղում, նրանց ըդերանց ցեղ են ասում»:

Եկեղեցու բակում՝ արեւմտեան պատի տակ կան արձանագիր խաչքարի եւ տապանաքարի բեկորներ.

7. **Խաչքարի բեկոր, 3 տող.**




Խ[Ա]ՉՍ Մ...

ԱՂԻ ...

ՓՐ[ԿՈՒԹԵԱՆ]: Նկ. 10


8. **Տապանքար, 2 տող.**



ՊՐԴ Է ՈՐԴԻՆ ԻՄ ՕՀԱՆՋԱՆ ԲԵԿԻՆ

ԹՎ[Ի]Ն ՌՃՀԱ (1722): Նկ. 11

9. **Տապանքարի բեկոր, 5 տող.**



ԱՅՍ Է ՏԱՊ[ԱՆ]

ԻՇԽԱՆ Թ...

ԳՈՒՈՎ ՊԵ...

ՆԵԱՆ ՄԵՐ ...

ՌՃԾ (1701)....: Նկ. 12

²⁴ Գորիսի բարբառում ֆանամային ասել են մաեւ աղեր, այսինքն տէրտէր / ըդերանց-տէրտէրանց/:

10. Տապանաքարի բեկոր, 4 տող.



...Ա ԱՅՍ Ն

...ՈՒՐՆ ԻՄ Շ...

...Ն ՀՈԳՈՅՆ

...[ՓՐ] ԿՈՒԹԻ[ԻՆ]: Նկ.13

Քարայր եկեղեցի. Գտնւում է ձորամիջում, Անապատի ձոր կոչուող վայրում: Այն ամբողջովին ժայռի մէջ է եւ ծառայել է որպէս եկեղեցի (Նկ. 27): Եկեղեցու ներսում կայ մէկ խաչքար (Նկ. 28), առանց արձանագրութիւնների, տարածքում՝ տապանաքարեր, որոնց վրայ քանդակուած են պարզունակ խաչեր²⁵: Գիւղացիներն այն անուանում են ձորամիջեան եկեղեցի, սակայն խնածախ գիւղում ընդօրինակուած ձեռագիր յիշատակարաններից մէկում կարդում ենք, որ Անապատի ձորի եկեղեցու անունը Ամենափրկիչ է: Ձեռագրի հեղինակը Մարիամն է, պատուիրատուն՝ Մարկոս եպիսկոպոսը.

«Գրեցաւ զսայ ի յերկրիս Քաշաթաղու, ի գուղս խանածախ, ընդ հովանեաւ Ամէնափրկչիս, ի Թրւականիս Հայոց ՌՂԶ-ին (1647). որում և մեք Թողաք զսա յիշատակ: Ով ոք զսա կարգայ և աւրինակէ, մի բերան զմեզ յիշէ և ողորմի ասէ՝ Աստուած իւրն ողորմեսցի, իւր միւսանգամ գալստեանն. ամէն»²⁶:

Դառնանք գիւղի զոյգ մատուռներին: Դրանցից մէկը գտնւում է Սբ. Հռիփսիմէ եկեղեցուց մօտ 20 մ հարաւ-արեւելք, Վ. Թունանեանի տնամերձ հողամասում: Տեղացիներն այն անուանում են Քմախաչի սրբավայր: Միւս մատուռը, որ կոչւում է Բհաւորի²⁷, կառուցուել է 13-14-րդ դդ. (Նկ. 14) եւ գտնւում է Անապատի հանդում՝ գիւղից մօտ 2 կմ հարաւ-արեւելք: Գիւղացիները մի քանի աւանդազրոյց գիտեն այդ մատուռի մասին. այդ հողակտորը, որտեղ կառուցուել է մատուռը, մի գիւղացու է պատկանելիս եղել: Հողը մշակելու ժամանակ մշակը սերմացուի պարկը ծածկել է շորով, որպէսզի արեւից պաշտպանի: Նրա որդին եկել, Թաքուն մտել է այդ շորի տակ եւ երբ մշակը վերադարձել է սերմացուն տանելու, զգացել է, որ ինչ-որ բան է շարժում շորի տակ: Կարծելով, թէ օձ է մտել պարկի մէջ, բահով ուժգին հարուածել է, որից եւ մահացել է նրա մանկահասակ երեխան: Հէնց այդ նոյն վայրում էլ վշտահար գիւղացին իր որդու յիշատակին կառուցել է մատուռը՝ անուանելով այն Բհաւորի:

Մէկ ուրիշ աւանդազրոյցի համաձայն՝ Բհաւորի մատուռից դէպի հարաւ-արեւելք մի փոքրիկ գիւղ է եղել: Այնտեղ ձիթհան-սրանոց է եղել, որտեղ բուսական իւղ են ստացել: Տարածքում սրբավայր կառուցելու համար քահանան իւրաքանչիւր գիւղացու առաջարկել է մի բահ օգնութիւն: Այստեղից էլ ծագել է մատուռի անուանումը՝ Բհաւոր:

Կայ նաեւ այսպիսի մի զրոյց, որում ընդգծւում է մատուռի զօրութիւնը. իբրեւ երաշտի ժամանակ կոյս աղջկայ ձեռքով քար է բերուել Բհաւորից եւ նետուել աղբիւրի

²⁵ Եր. Լալայեան, Ազգագրական հանդէս, հ. Դ, Թիֆլիս, 1898, էջ 37:

²⁶ Հայերէն ձեռագրերի յիշատակարաններ, Ժէ դար, հ. Գ, կազմեց՝ Վ. Յակոբեան, Երեւան, 1984, էջ 256, հ. 421:

²⁷ Բհաւոր բառի հիմքում ընկած է բահ բառը: Գորիսի բարբառում բահը արտասանում են պահ, ուստի Բհաւոր՝ Պհաւոր, այսինքն պահով (բահով) մարդ:


շրի մէջ, որից յետոյ յորդ անձրեւ է տեղացել²⁸:

Մզկիթ. Գիւղում պահպանուել են մզկիթի մնացորդներ կամ աւերակներ, որոնք վկայում են, որ ժամանակին այստեղ քրդեր են ապրել: Կիսաւեր մզկիթը կամ ինչպէս գիւղացիներն են ասում քումբազը, գտնուում է Ղուզի մայլա կոչուող թաղամասում (**նկ. 15**): Այն կառուցել է մելիք Հայկազի հաւատափոխ եղած եւ Ալլահվերդի անուն ստացած որդին, որն իր հօր կենդանութեան օրօք կամեցել է ստանձնել մելիքութիւնը, որի համար գնացել է շահի մօտ, մահմետականութիւն ընդունել եւ շահի զօրքով եկել հօր դէմ: Այդ ժամանակ մելիք Հայկազն արդէն մահացած է եղել եւ մելիքութիւնն ակամայից անցնում է նրան²⁹: Վերոնշեալ Ալլահվերդու պատմութիւնը գրի է առել նաեւ Ս. Խան-զադեանը³⁰:

Խոնաձախի նշանաւոր խաչքարերը. Խորհրդանշական են գիւղը եզերող բարձունքներին կանգնեցուած խաչքարերը, որոնց վիմագրերում յիշատակուած են մելիքական տոհմի նշանաւոր անձինք: Վիմագրերի հիմամբ Մ. Հասրաթեանը յստակեցրել է Քաշաթաղի մելիքների ծագումնաբանութիւնը, Քաշաթաղում յայտնուելու փաստերը եւ թուագրութիւնը: Տեղացիներն աւանդազրոյցներ են պատմում խաչքարերի մասին, մինչդեռ դրանցից իւրաքանչիւրը պատմական մի կարեւոր ժամանակահատուածի վկայութիւն է: Բլուրներից իւրաքանչիւրն ունի իր անուանումը, իսկ այնտեղ կանգնեցուած խաչքարերն իրենց նշանակութիւնն ու պատմութիւնը: Մենք հնարաւորութիւն ունեցանք գրի առնել գիւղի նախկին մանկավարժ Օլգա Յովսէփեանի հետ զրոյցը: Ի դէպ, խաչքարերից մէկը գտնուում է հէնց նրանց հողամասի մէջ: Այդ խաչքարերն իբրեւ թէ կանգնեցուած են եղել գիւղի մի մեծահարուստ մարդու երեխաների յիշատակին: Ոմանք պնդում են, որ դրանք կանգնեցուել են չորս եղբայրների յիշատակին, ովքեր գիւղի մեծահարուստի զաւակներն են եղել: Նրանց յիշատակը անմահացրել են՝ գիւղի բարձունքին կանգնեցնելով խաչքարեր:

11. Խաչքար (1,70 x 0,70 մ) գիւղի հիւսիսարեւմտեան բարձունքին՝ Ճղացի խութ կոչուող բլրի վրայ: Պահպանուել է կոտորուած խաչքարի վերին կէսը, հետեւեալ արձանագրութեամբ. «ԵՄ՝ ՀԱԽՆԱԶԱՐ, Կ[Ա]ՆԳ... Աւելի վաղ Մ. Հասրաթեանը գրառել է խաչքարի բուն բովանդակութիւնը. ԵՄ՝ ՀԱԽՆԱԶԱՐ, ԿԱՆԳՆԵՅԻ ԽԱԶՍ ՀԱԽԻՐԵՂԲԱԽԻ ԻՄ՝ ՂՈՒԼԻՆ, ԹՎ. ՌԼ (1581)³¹: Տեղացիների հաղորդմամբ՝ խաչքարը վնասուել է կայծակից: Յետագայում, Խաչեր կոչուող տարածքից մի խաչքար է բերւել եւ տեղադրուել վնասուած խաչքարի անմիջապէս կողքին՝ պատուանդանի վրայ: Քիւին խաչքարի տեղափոխման եւ տեղադրման տարեթիւն է.

Հստ Ալ. Մուսաէլեանի անտիպ արխիւի. «1985 թ. Մայիսի 10-ին կայծակը խփում է գիւղի հիւսիսարեւմտեան բլրի վրայ կանգնեցուած խաչքարին: Այն կրկին կանգնեցւում է 1987 թ-ի Մայիսի 10-ին»:



1987 թ.: նկ. 16

²⁸ Աւանդազրոյցները մեզ պատմեց խոնաձախի Ար. Աբրահամեանը: Այն գրի է առել նաեւ գիւղի նախկին մանկավարժ Ալ. Մուսաէլեանը, աւանդազրոյցները պահպանուել է նրա անձնական անտիպ արխիւում:


²⁹ Եր. Լալայեան, նշ. աշխ., էջ 14:

³⁰ Ս. Խանզադեան, Հայրենապատում, Երեւան, 1981, էջ 120:

³¹ Մ. Հասրաթեան, նշ. աշխ., էջ 163:

12. **Խաչքար.** (2,0 x 0,60 մ)³²: Գտնուում է գիւղի հիւսիսարեւելեան բարձունքին: Երկ-
լեզու՝ (հայերէն-պարսկերէն) արձանագրութեամբ 1620 թուակիր խաչքար է³³ (**Ճկ. 17**):

13. **Խաչքար** (2,20 x 0,80 մ)^{34, 35}: Կանգնեցուած է Մոթալ-ղայա բլրի վրայ, Ջումանց
կալում կամ Բաղդասարեանների տնամերձ հողամասում: Ասում են, տարիներ առաջ
Բաքուից իրենց գիւղ տեղափոխուած եւ բնակութիւն հաստատած մի ընտանիք հո-
գեկան խնդիրներով մի տղայ ունէր, ով պնդում էր, որ աստծոյ կողմից հրաման ունի
սեւացնելու գիւղի բոլոր խաչքարերը: Գիւղի գերեզմանատան խաչքարերից շատերն
արդէն հասցրել էր սեւացնել ու մի գիշեր էլ, մագութով լի տարան ձեռքին եկել էր,
որպէսզի սեւացնի նաեւ իրենց հողամասում գտնուող խաչքարը, որը նրան այդպէս էլ
չյաջողուեց: Տիկին Յովսէփեանն ասում է, որ յաճախ է խաչքարը կործանումից փրկել:
Պատմում է, որ գանձագողութեան նպատակով գալիս էին խաչքարի տակը քանդելու,
որտեղ ամփոփուած է մեծահարուստի աղջիկ: Փաստօրէն, երկու զրոյց է շրջանառ-
ւում, խաչքարերը մեծահարուստի չորս տղաների կամ մեծահարուստի երեք տղաների
եւ մէկ աղջկայ յիշատակին են կանգնեցուած:



ԿԱՄԱԽՆ ԱՅ, ԵՍ՝ ԱԻՔԱՆ, ԿԱՆԳՆԵՑԻ ԶԵԱԶՍ Ի

ՓՐԿՈՒԹԵ[ԱՆ] ՀՈԳՈ ԻՄՈ, ՅԻՇԵՅԷԲ Ի ՔՍ:

ԹՎ[ԻՆ] ԶԾ (1301): Նկ. 18

14. **Խաչքար.** (1,50 x 0,80 մ). սեւ բազալտից³⁶, կանգնեցուած է պատուանդանի
վրայ. Բահաւորի եկեղեցուց հիւսիս, Յուղնատու խութ կոչուող բլրի վրայ: Յուղնա-
տուն բոյս է, որից էլ ծագել է բլրի անունը: Հաւանաբար տարածքում նման անունով
բոյս է աճել: Ներկայումս գիրը հողմահարուած է: Այս խաչքարի մասին տեղեկութիւն
է պահպանուել պրոֆեսոր Գր. Գրիգորեանի անձնական արխիւում: Մեզ յաջողուեց
նախկինում արուած լուսանկարի հիման վրայ վերծանել խաչքարի քիւին տեղ գտած
արձանագրութիւնը, որի գրաւոր վերծանութիւնը եւս պահպանուել է պրոֆեսորի՝ Սիւնի-
քում կատարած հետազոտութիւնների՝ Գորիսի շրջանին նուիրուած դաշտային օրագ-
րերից մէկում:

³² Գր. Գրիգորեանի դաշտային օրագիր, էջ 52:

³³ Մ. Հասարթեան, նշ. աշխ., էջ 164:

³⁴ Նոյն տեղում, էջ 161:

³⁵ Գր. Գրիգորեանի դաշտային օրագիր, էջ 53:

³⁶ Նոյն տեղում, էջ 51:

ԵՄ՝ ՄԷԼԻՔ ՂԻՄԱ, ԿԱ

ՆԿՆԵՅԻ ՍԲ ԽԱԶՍ Հ

ՕՐՆ ԻՄ ԳԻՆՈՍԻՆ

Ի ՌԾԹ (1601)³⁷: Նկ. 19

Թուով տասներեք խաչքար կայ կանգնեցուած Զալուկի խույթ կոչուող սրբավայրում: Դրանք անարձանագիր են, որոնց վրայ կան պարզունակ քանդակներ եւ խաչեր: Աւանդոյթի համաձայն՝ հէնց այս սրբավայրից են զինուորական ծառայութեան ճանապարհում գիւղի երիտասարդ տղաներին:

Դառնանք գիւղի գերեզմանատանը պահպանուած խաչքարերին: Վերջերս յուշարձանների պահպանութեան Սիւնիքի մարզային ծառայութեան աշխատակիցների կողմից (ղեկավար՝ Անահիտ Գրիգորեան) աշխատանքներ իրականացուեցին խնամախի գիւղամիջեան գերեզմանատանը: Հողածածկից մաքրուեցին եւ վեր հանուեցին մի շարք նորայայտ արձանագրութիւններ, որոնք էլ ներկայացնում ենք ստորեւ.

15. **Խաչքար.** քանդակազարդ, քիւին եւ ստորին հատուածում, թուականը հիմնախորանի վերին երկու անկիւններում.



ԵՄ՝ ՀԱՅԿԱԶՍ, ԵՒ ՄԱՅՐՆ ԻՄ ՆԱԶ

ԼՈՒԽԱՆՍ, ԿԱՆԿՆԵՅ[ՈՒՅԱՔ

ՍԲ ԽԱԶՍ

ԹՎ[ԻՆ] ՌՃԱ (1652)

ՓԲԿՈՒԹԻ[ԻՆ] ՀՈԳ[ՈՅ] ՄԱԻՐՆ

ԻՄՈՅ՝ ԽԱԹՈՒՆԱՂԻՆ ՈՐ ԷՐ ԿԻՆ ՅԻՇ

ԽԱՆԻՆ, ՈՐ ԱԻՂԼԱՆ ՔԷՇԻՇ ԿՈԶԻՆ: Նկ. 20

Աւղլանքէշիշ (Օղլանքէշիշ) թուրքական անձնանունն է, առաջացել է տղայ եւ քահանայ բառերից. յիշատակում է 1605 թ.³⁸: Խաթունաղան եւս թուրքական անձնանունն է, նշանակում է ազնուական տիկին: Գործածում է 16-18-րդ դդ.³⁹:

16. **Խաչքար,** քանդակազարդ, հիւսածոյ զարդերով քիւի երկու եզրերը կտտրուած, կենտրոնում՝ խորագիր մակերեսի մէջ խաչ, թուականը խաչաթեւերի տակ.

³⁷ Նոյն տեղում, էջ 49:

³⁸ Տր. Աճառեան, Հայոց անձնանունների բառարան, հ. 5, Երեւան, 1962, էջ 234:

³⁹ Նոյնի՝ հ. 2, Երեւան, 1944, էջ 447:



ԹՎ[ԻՆ] ՉԼԸ (1289) : նկ. 21

17. **Խաչքար.** քանդակագարդ, կենտրոնում փորագրուած են զոյգ խաչեր, ստորին հատուածում՝ 2 տող.



ԱՆՈՒԱՄԲՆ ԱՅ ԵՍ ԽԱՂ/

ԻՉԱՆՈՒ ...ԻՐԷԱ ԿԱՆԳ... նկ. 22

Արձանագրութեան վերջին տողի երկու բառերն անընթեռնելի են, յստակ է միայն, որ անձնանուն է, որին յաջորդում է բովանդակային առումով կանոնական **կանգնեցի սուրբ խաչս** ձեւակերպումը: Գր. Գրիգորեանի դաշտային օրագրում պահպանուել է այս խաչքարի թուականը, որն այժմ եղծուած է: Վիմագրագէտն իր օրագրում գրառել է՝ ԹՎ. ՉԱ (1252)⁴⁰:

18. **Խաչքար.** քանդակագարդ, ճակատին չորս խաչեր, կենտրոնում՝ քանդակագարդ խաչ, աջ եւ ձախ կողմերում եղծուած արձանագրութեամբ, թուականը աջակողմին: Հողածածկի տակ մնացած ստորին հատուածը նոյնպէս արձանագիր է, որի վերծանութիւնը պահպանուել է Գր. Գրիգորեանի դաշտային օրագրում⁴¹.

.Ս

ԻՄ

...

ՈՅ

ՈՒ

ՈՏ

ԽԱՅԱՅ ԿԱԿՆ

ՈՒ

ԵՅԻՆ ԽԱՉՍ ՈՐԴՈՅ ԽԱՅԱՅ... ԹՎ ՉԵ (1256/: նկ. 23

⁴⁰ Գր. Գրիգորեան, դաշտային օրագիր, էջ 54:

⁴¹ Նոյն տեղում, էջ 54:

Բացի արձանագրուած խաչքարերից, գերեզմանատանը տեղ են գտել նաեւ քանդակագործ, անգիր խաչքարեր (նկ. 24, 25):

Գիւղում կանգուն է մինչ այժմ ջրի հիմնական աղբիւր հանդիսացող Մեջի մահլի աղբիւրը՝ քահրիզը: Քահրիզ բառը պարսկերէնից նշանակում է թունելով բերուած ջուր:

19. Աղբիւրի պատին պահպանուել է յուշաքար՝ հետեւեալ արձանագրութեամբ.

ՅԻ ՀԱՏԱԿԻ ԱԽԲՈՐՍ ՍԼՂՈ-Լ
ԵՑԻ ԱՓՈՒ ՈՐԴԻ ՌՍԴԱՄԻՆ
ԻՐԻՆ ԳԱՆՈՒՍՏԻՆ ԻՍԱԶԱՏՈ
ՅԱՐԱՆՇՏԻՆ ԴԱՆԻԷԼՆ 1861


ՅԻՇԱՏԱԿ Է ԱԽԲՈՐՍ ԱԼՂՈՒԼ
ԵՑԻ ԱՓՈՒ ՈՐԴԻ ՌՍԴԱՄԻՆ, ԱՄ
ԻՐԻՆ, ԳԱՆՈՒՍՏԻՆ, ԽԱԶԱՏՈՒՐԻՆ,
ՅԱՐԱՊԵՏԻՆ, ԴԱՆԻԷԼԻՆ 1861: Նկ. 29

Ուշագրաւ է արձանագրութեան մէջ յիշատակուած «ալղուլեցին»։ Ժամանակին Ալղուլ անունով գիւղ է եղել, որը գտնուել է Հակարոյ գետի աջ ափին։ Այն, իբրեւ հայաբնակ գիւղ, գոյատեւել է մինչեւ 1905 թ.։ Վերջնականապէս հայաթափուել է 1918 թ. եւ բնակեցուել թրքախօս քրդերով եւ թուրքերով⁴²։ Աղբիւրի պատին յիշատակուած են ալղուլեցի Ափու որդիները։

Ալ. Մուսաէլեանի արխիւում կարդում ենք. «Քահրիզի ղաբի համար դրամը տրուել է ալղուլեցի Դանիէլեան Ռուստամի կողմից։ Կառուցողը եղել է Խնածախ գիւղի լաւագոյն վարպետ Սիմոն Սիմոնեանը»⁴³։

Ամփոփելով՝ արձանագրենք, որ 16-րդ դարի առաջին կէսին մելիքանիստ դարձած Խնածախ գիւղն իր հարուստ անցեալի ու պատմամշակութային ժառանգութեան կրողն է։ Այսօր աւելի քան առաջնային են դառնում Հայաստանի սահմանամերձ բնակավայրերի մշակութային արժէքների ուսումնասիրութիւնն ու հանրայնացումը, ի փառս մեր պատկառելի ու բովանդակալից անցեալի։ Սիւնիքի նշանաւոր մելիքանիստ գիւղերից մէկի՝ Խնածախի պատմական յուշարձաններն առաջին անգամ փորձ է արւում ներկայացնել համահաւաք ձեւով։ Տեղի թուով 15 նորայայտ արձանագրութիւն առաջին անգամ կը դրուեն գիտական շրջանառութեան մէջ։ Անդրադարձանք նաեւ մելիքական տոհմից սերող անձանց, ովքեր կարեւոր դեր եւ հեղինակութիւն են ունեցել։

Լուսանկարներ



Նկ. 1



Նկ. 2

⁴² Ս. Կարապետեան, նշ. աշխ., էջ 174:

⁴³ Ալ. Մուսաէլեանի անտիպ արխիւ, էջ 6:



Նկ. 3



Նկ. 4



Նկ. 5



Նկ. 6



Նկ. 7



Նկ. 8



Նկ. 9



Նկ. 10



Նկ. 11



Նկ. 12




նկ. 13



նկ. 14



նկ. 15



նկ. 16



նկ. 17



նկ. 18



նկ. 19



նկ. 20



նկ. 21



նկ. 22




Նկ. 23



Նկ. 24



Նկ. 25



Նկ. 26



Նկ. 27 լսնկ.՝ Մ. Յակոբեանի



Նկ. 28 լսնկ.՝
Մ. Յակոբեանի

ՍԱԹԵՆԻԿ ԽՈՒՐՇՈՒԴԵԱՆ

ՀՀ ԳԱԱ Հնագիտության եւ ազգագրության ինստիտուտ